

VIJESTI



Istina je žrtvama najvažnija

Predsjednik Helsinškog odbora za ljudska prava u Republici Srpskoj Branko Todorović rekao je jučer u Zvorniku, na skupu povodom inicijative za osnivanje regionalne komisije o ratnim zločinima u bišoj Jugoslaviji, da bi eventualno formiranje komisije za utvrđivanje činjenica o ratnim zločinima i drugim teškim povredama ljudskih prava u nekadašnjoj Jugoslaviji bilo veoma važno za žrtve, istinu i novi početak u regionu, javila je Srna.

Direktorica Fonda za humanitarno pravo iz Beograda Nataša Kandić ocijenila je da postoji potreba da se o prošlosti razgovara na osnovu činjenica, što se može postići formiranjem komisije koja će da prikupi sve podatke, kako ne bi ostao ni jedan nerazjašnjen ratni događaj u regionu.

Predsjednik Foruma građana Tuzla Vehid Šehić smatra da u BiH trenutno imaju tri istine koje mogu mlade generacije da odvedu na stranputicu, jer ne postoji objektivno sagledavanje šta se sve dešavalo u prethodnom periodu.



Pravo i tranzicijska pravda

U organizaciji Udruženja studenata prava Pravnog fakulteta u Sarajevu, počela je Treća međunarodna ljetnja škola "Tranziciono pravo i pravda", koja će trajati do 21. jula. Ljetna škola okupila je tridesetak studenata prava iz Sarajeva, Mostara i Banje Luke, te po pet studenata iz Srbije i Hrvatske. Finansijsku podršku dali su Pravni fakultet iz Sarajeva i Rektorat Univerziteta u Sarajevu.

Predsjednik Udruženja studenata prava Haris Ibričić kaže da su glavne teme ljetnje škole pomirenje, suživot i uspostavljanje dijaloga sa mladim iz susjednih zemalja. Predavači su profesori prava, kriminalistike i političkih nauka sa sarajevskih fakulteta, kao i predstavnici Razvojnog programa UN-a, Međunarodne komisije za nestale osobe i Ministarstva pravde BiH.

Osvještana crkva u Gradačcu

Vladika tuzlansko-zvornički Vasilije Kačavenda u nazočnosti petnaestak pravoslavskih svećenika i više stotina vjernika i građana Gradačca, Modriče i Bosanskog Šamca jučer je osvještao novoobnovljenu pravoslavnu crkvu sv. Ilije proroka u Gradačcu.

U obnovi gradačacke pravoslavne crkve zajednički su sudjelovale općine Gradačac i Modriča.

U Banjoj Luci okončana manifestacija Vezeni most Ni želje, ni strategije za povratak

Kad dođu političari iz BiH među dijasporu, apeluju za povratak, a kada dođete, onda su vam sva vrata zatvorena

• Davidović obećao pare, a zatim ignorisao i ljude i događaje

U Banjoj Luci u petak je okončan tradicionalni susret Banjalučana – Vezeni most. Književne večeri, niz sportskih manifestacija, svečani koncert... bili su prilike za susret sugrađana. No, ružnu mrlju na cjelokupnu manifestaciju ostavila je uprava Grada Banja Luke, pokrovitelj ovih događanja.

Gradonačelnička bruka

Iako je održavanje Vezene mosta planirano u gradskom budžetu, na račun organizatora manifestacije, Zajednice udruženja građana, nije doznačena nijedna marka, pa umjesto sumiranja rezultata, sada preostaje da zbrajaju dugove. Pravdanja da novca nema zbog opšte ekonomske krize teško je prihvatiti, jer je ove godine iz gradskog budžet utrošeno preko šest miliona KM za održavanje Svjetskog prvenstva u raftingu, što je otvorilo i niz pitanja koliko je racionalno postupalo s tolikim novcem.

Daleko više od novca, Banjalučane, kako povratnike tako i one raseljene, povrijedila je činjenica da je gradonačelnik Dragoljub Davidović bez prethodne najave otkazao održavanje Tribine na kojoj je

trebao, kao i prethodnih godina, odgovarati na pitanja svojih sugrađana. Rečeno je da je prvi čovjek grada na godišnjem odmoru da bi se poslije ustanovilo da je Davidović ne samo u petak bio u Banjoj Luci nego i da je u terminu predviđenom za održavanje tribine zakazao sjednicu Skupštine grada.

Tako su, umjesto u gradskoj upravi, Banjalučani svoje probleme i pitanja iznijeli u hotelu Bosna. A pitanja je, kao i svih poratnih godina, bilo napretek, od izgradnje infrastrukture u povratničkim naseljima, bezuspješne kampanje vraćanja naziva naselja i ulica makar u tim dijelovima grada, pa do zapošljavanja koji je i osnovna prepreka većem povratku mlade populacije.

"Ovo pokazuje da se vlast u Banjoj Luci malo promijenila svih ovih poratnih godina i da joj i nije u interesu da se prognanici vrate. Jer, da je drugačije gradonačelnik bi našao sat vremena da s nama porazgovara", kazao je Edin Osmančević. On s porodicom živi u Švedskoj gdje se, dobro snašao, pa je zainteresiran i za pokretanje posla u Banjoj Luci.



Ima li Banja Luka strategiju povratka, pitanje bez odgovora

Zahtjevi kupe prašinu...

Nada Stefanović je medicinska sestra i već 18 godina živi u Hajdelbergu u Njemačkoj.

"Skoro ću u penziju i željela sam da svoje znanje stečeno u njemačkim bolnicama prenesem i ovdje i osnujem centar za patronažnu službu. Zahtjev koji sam podnijela leži već godinu dana u nekoj ladici u gradskoj upravi, a u Banjoj Luci je toliko starih i nemoćnih osoba kojima bi ova vrsta pomoći bila prijeko potrebna", kazala je Stefanović.

"Međutim ovdje još uvijek vlada pravna nesigurnost, politički odnosi su komplikovani i sve to me odbija od ulaganja", dodaje Osmančević.

Razočarenje je doživjela i Dijana Trokić, koja se s porodicom, nakon šesnaest godina, vratila iz Kanade.

Podijeljena osjećanja

"Probleme na koje smo naišli rješavajući svoj status tako su veliki da se pitam da li je povratak imao ikakvog smisla. Kad dođu političari iz BiH

među dijasporu, apeluju za povratak, a kada dođete, onda su vam vrata sva vrata zatvorena", ističe Trokić.

Ima li Banja Luka ikakvu strategiju za povratak, pitanje je koje je ostalo bez odgovora. Tako će se i ovog kao i svih prethodnih ljeta, u Švedsku, Dansku, Norvešku..., povratnici vratiti podijeljenih osjećaja – nostalgije i želje za životom u rodnom gradu i realnosti da im taj grad nije spreman ništa ponuditi.

G. KATANA

Fondacija Cure organizovala još jednu X-press sesiju



Radni doručak za novinare

Foto: D. TORCHE

U organizaciji Fondacije Cure jučer je u Sarajevu održana još jedna X-press sesija, ovog puta okupljeni su razgovarali o temi "Bh. novinarstvo između margine i strane u sukobu".

Tom prilikom, uz doručak u bašti Barhana, razgovarano je o načinu na koji novinari pra-

te priče, u odnosu na očekivanja njihovih urednika ili vlasnika medija. Učesnici sesije pokušali su odgovoriti na pitanje da li se novinarima u našoj zemlji pruža mogućnost da samostalno oblikuju priče, bez uticaja drugih strana. Uvodnik sesije bio je Ekrem Tinjak, novinar magazina Start.

Novinarstvo između margine i strane u sukobu

Postoje profesionalne norme ispod kojih novinarstvo ne smije ići, zaključeno na sesiji koju je vodio Ekrem Tinjak, novinar Starta

Zaključeno je da novinar, bez obzira na to je li početnik, mora imati stav, te da postoje profesionalne norme ispod kojih novinarstvo ne smije ići i mehanizmi za reakciju kod urednika.

X-press sesije organizuju se jednom mjesečno i to subotom, istovremeno u Sara-

jevu i Banjoj Luci i posvećene su marginaliziranim grupama. Na jesen će zaživjeti i radionice sa studentima žurnalistike na bh. fakultetima. Istovremeno, biće uspostavljena i godišnja novinarska nagrada za izvještavanje o marginaliziranim grupama.

J. F.